

四庫全書

集部

欽定四庫全書

文忠集卷十七

省齋文藁十七

宋 周必大 撰

題跋四

光堯御筆賜陳正彙白金三百兩跋

諫官陳瓘夢奠于宣和墓木未拱而光堯眷禮正彙如此其不能恭承嘉惠者天也是年十月正由遂為考功又數年正同亦自省郎驟掾公府竟至侍從興王賞諫

臣善善及子孫古或有之然未有如我光堯眷眷陳氏
有加而無已者也後之人盍思紹先烈而報國哉淳熙
三四年四月三日

跋皇祐朝賢送張肅提刑詩卷

右皇祐庚寅冬朝賢送張肅赴江東提刑詩一卷由司
馬溫公范蜀公而下凡十有四人溫公復追錄岳州送
行一篇按仁宗實錄慶厯七年五月張公自廣東運判
擢利路提刑會有指其前在任過市物者九月貶知岳

陽至是乃得牽復今讀溫公新詩以松不彫寒絲曾斷
直為褒舊詩有出群得罪鶴介難憎之歎是必以廉直
反為同僚讒賊多端者巧中耳又一聯云飲水豈容吳
刺史謗書翻似馬將軍前輩用事精確如此張公雖止
祠曹郎中按刑閩服然蓄其餘澤敷遺後裔子孫祿仕
奕世不絕紹興初曾孫延壽遂為侍御史天之報施昭
昭矣庚寅距今實百二十七年侍御之子宣教郎適正
來求跋語偶夜直玉堂敬附名于卷尾且以見太史氏

因官文書紀事往往是非失實秉筆者當致審云淳熙
丙申七月十九日

跋程宗正之子鑄墓銘

哭鯉傷烏聖賢有所不免今新安程公銘冢子之藏筆
力得于天成慈愛出于天性使人讀之於十年之後猶
太息不已黃太史云眼看白壁埋黃壤何況人間父子
情予於程亦云淳熙丙申七月二十一日東里周某書
時同試館職於玉堂

跋范元卿所藏醉翁帖

右南宮舍人范元卿所藏醉翁帖翁喜賢俊重交遊出於天性其立朝尤相善者劉與蔡也觀此畧可見矣今居士前後集有手書數卷而寄原甫帖在焉所謂用快大過及饌聖從與景仁介甫清坐終日等語良是至于才薄任過有望于公以濟不逮及未歸間不惜時枉問之類大率意同辭異獨論簡事為外名迹幾百言而真蹟殊無之數日大風至照管公儀家則集本略不載夫

尺牘出于信筆非若著書容有刪潤也縱後人傳寫差
誤亦當不過十數字乃爾異同何耶二者非一時所作
則又事辭不應甚似如此元卿素以博洽聞願質疑焉
淳熙三年八月二十七日

跋韓忠獻王帖

右韓忠獻王答司馬文正公手書其前二幅蓋熙寧四
年春文正自雍移許時也後二幅則歸洛矣二公在嘉
祐中固已忠義相許及治平初忠獻畫陝西義勇之策

文正四論其非畧無假借已而自劾至于三奏六申中
書前輩周而不比和而不同大抵如此暨王介甫得政
時異事變尺牘酬答孜孜以為國為宗社為天下為禱
大忠大義執鞭欣慕忠獻豈虛辭相悅哉使當時見之
可以動悟人主後世觀之可以庶貪立懦彼為無使齊
年知無使上知之語者讀此顙其泚矣竇君即舜卿也
淳熙三年十一月二十日奉勅同文正曾孫權吏部侍
郎偕齋祠璿璣觀出示此帖敬題其後

題金華喻葆光書佛經卷

良能
之文

王龜齡遇人談釋氏輒詆罵乃首為喻居士題經卷古
人能起後人之敬必有道矣非專以其子為同年進士
也淳熙四年三月十二日

跋宇文虛中砬書

宇文公忠謀義槩謂當享平國君之封而天不相之乃
從庾珉王儁于地下可為痛哭流涕淳熙丁酉二月戊
午

同前

蘇屬國看羊海上假雁足帛書而得歸宇文公真有此書而不得歸悲夫淳熙四年三月十八日

跋初寮先生帖

初寮先生未冠時及拜東坡于中山筆精墨妙宜有傳授當政宣間禁切蘇學一涉近似旋坐廢錮而先生以奪胎換骨之手揮毫禁林初無疑者靖康而後黨禁已解玉佩瓊琚之詞怒猊渴驥之書盛行于東南然後人

人知其為蘇門顏閔也晁張復生其雁行先生與仲明尚公及某之大父俱為元符庚辰進士故尚公之孫中庸出示此帖敬題其後淳熙丁酉四月既望

跋鄒志完曾祖詩

詩語忠誠心畫莊厚天禧天聖間氣象大率如此可以尚論其世矣忠公作跋時正遭外艱所謂聰聽祖考之彛訓未葬讀喪禮既葬讀祭禮者耶淳熙丁酉四月己卯六世孫朝奉郎燧以示舊同僚東里周某敬題其後

跋閑樂居士陳師錫與了翁陳瓘論王氏日錄

書

陳了翁以元符庚辰八月為司諫雖論裕史不當用日錄然多是王介甫而非蔡卞明年八月自都司出守海陵閑樂先生實遺以書其後了翁猶有合浦尊堯之作大觀四年始因星變復上四明尊堯集及尊堯餘言痛悔前作則此書為有助矣淳熙丁酉予判吏部南曹閑樂之孫昌年適來調官出示遺墨乃畧考歲月而歸之

五月二十五日

跋淨慧寺東坡題名

佛日淨慧禪寺在桐扣黃鶴峰下寺中有池池有渥洼泉東坡先生嘗賦五絕句所謂細泉咽咽走金沙者堂上留題今既百年而詩僧慧舉乃謀入石可謂好事矣桐扣以張華得名俗云同口非也淳熙五年正月九日跋陳晞顏從古和簡齋陳去非詩

淳熙五年正月丁巳天寒甚獨直玉堂快讀同年晞顏

和簡齋詩五百一十餘首已愧王摩詰不能致孟浩然之伴直當如裴垽他日對草玄甫制耳

書簡修行狀後

從事郎清江簡公之卒也其鄉人胡開孺實為行狀今四十七年矣而從事之弟致政思邈公屬某以銘昔政和中先君隨侍大父官鄜州法當由鄰郡升貢簡公實為坊州教授蓋嘗擊節先君之文今行狀備載其事可謂有先契矣銘何敢辭然聞開孺乃山谷先生同年彥

明之子詩人藏之之弟承父兄師友淵源之正其辭曰
光玉潔雲蒸而川流也從事得此自宜不朽鄙辭尚安
所措姑題卷末歸之簡氏淳熙五年二月十七日

跋趙善應行實

有關雎之應然後公子有信厚之風有行葦之仁然後
人有士君子之行周則然矣本朝奚愧焉觀子直著作
叙其先人之遺事寧不槩見蓋古者子孫論撰先世之
美明著之後世雖本于崇孝而終實重其國家溯流求

源固非一日積也採詩者出尚有考于斯文淳熙五年

六月晦日

跋趙子崧詩集後

靖康之難近畿諸郡皆陷獨端明公以宗室祭酒堅守
淮寧首尾半年迄收趙犂保境之功又能詆訶閭位糾
合齊盟部邑築壇遂參佐命不幸不為娼嫉者所容復
使出鎮京口名曰因任所長實欲陷之死地未幾狂寇
暴至無城可守無兵可禦猶與其下力戰重傷然後退

保江岸上章待罪媚者計得坐貶龔州昔唐天寶之亂
河朔盡陷獨顏魯公固守平原及至德改元不能當史
思明尹子奇之鋒乃棄郡渡河惟公始末大率類此魯
公進官公則遠徙人謀不臧一至是耶賴德壽皇帝深
察非辜尋復朝散大夫示將復用而公遽即世矣豈非
命與淳熙戊戌秋公之孫師聽示公詩文及遺墨因為
畧辨當時之事以告著作氏

跋向子諲家邵康節戒子孫文

康節先生心聲正大可以銘盤心畫道勁可以貫隼鄉
林公寶藏以示子孫厥有旨哉淳熙戊戌十月十二日
觀於槁文堂

跋汪聖錫家藏東坡與林希論浙西賑濟三帖
林子中與坡公素厚善後又為杭州交承故書問惓惓
如此林雖尋為利誘折資草制詆公不遺餘力然猶愛
此帖弗棄至其子孫始以遺玉山汪氏乃知惡直醜正
顛倒是非者豈盡喪其良心哉稂莠害之耳淳熙五年

十月十三日東里周某觀于搗文堂

跋徐鉉篆李衛公項王亭賦

常侍此書陽冰之後一人而已淳熙戊戌十月十三日

跋蘇舍人題臨蘭亭序詩

有若似夫子尚興闕里門虎賁狀蔡邕猶旁文舉樽
昭陵自一閑真蹟不復存予今獲此本真可比璵璠
翰林學士承旨中書舍人蘇易簡于玉堂北軒題

蘇易簡題蘭亭軸詩以其官考之當在淳化二三年或

四年中距今淳熙五年十月殆一百九十年翰林學士
中奉大夫周某題于行在玉堂之東軒

跋黃魯直蜀中詩詞

王公權荔枝綠頌姚君玉
安樂泉頌茶詞滿庭芳阮

郎
歸

杜少陵劉夢得詩自夔州後頓異前作世皆言文人流
落不偶乃刻意著述而不知巫峽峻峰激流之勢有以
助之也山谷自戎徙黔身行夔路故詞章翰墨日益超
妙觀此三帖蓋可知也淳熙五年十月十三日

跋王禹玉內外制草

中書舍人陳騏翰林學士周某同觀岐文恭公內外制
草淳熙五年十月十三日

又跋王禹玉謝翰林學士承旨表本

翰苑多雜製故其體不一某以乾道庚寅歲初忝寓直
凡詞頭之小者院吏輒以片紙錄舊作于前謂之屏風
兒子笑曰此陶穀所謂一生依本畫葫蘆耶今觀王岐
公謝承旨表藁亦連別本殆屏風之類矣其詞謂繇西

掖入北門行將二紀又云鼎聖歷之肇新顧藩麾之屢
易則為張文定公安道無疑然閎博燕閑浮黿宣精等
語岐公表實用之文體大畧亦相類二公蓋同直者願
不嫌于同此前輩廣大規模也淳熙戊戌十月十四日

又跋王禹玉立英宗為皇子詔草及當日請對

奏藁

岐公既於中書聚廳處受御劄立皇子夫復何疑猶請
對而後草詔可謂過乎思慮矣然卒不免于讒語賴英

宗聖明延見藥珠進職端明且有盤龍金合之賜逢辰則然智力何有哉不然先日之謹畏祇足以成後來之罪戾耳淳熙戊戌十月十五日

跋歐陽公與通判弋田等三帖

張幾仲
待制家

某已刻六一先生帖數卷于家塾他日當摹此三帖附益之淳熙戊戌十一月二十五日

跋黃魯直與全父醉帖

僕以淳熙乙未春與幾仲同次對數文閣幾仲旋鎮襄

漢三年而歸又獲接武內朝會江西謀帥幾仲復在選
中千騎塞途旌旄赫奕僕往慶焉天盛寒飲沆瀣一杯
徑醉幾仲出山谷醉筆輒題其後他日歸為部民當再
觀于滕王閣之上淳熙五年十一月二十五日

跋王介甫彌勒偈

王荊公書楷法如此者絕少端明胡公已茂所謂不敢
以易心為之者是也又平生儉約未嘗輕用縑帛獨于
佛語用之亦是意耶淳熙戊戌十一月二十五日

跋黃魯直畫寢呈李公擇四詩

詩雜古律字兼行草此山谷得意之作也淳熙戊戌十一月二十五日

跋東坡帖

淳熙戊戌十一月二十五日東宮講讀因與同僚共觀坡仙墨妙而戴子微太常亦出懶放一帖大概絕相類惟拜字異耳真臨雖難辨要皆書法也

跋馮京與朱諤右丞家書

右馮文簡公與其孫壻朱忠靖公書前一幅元祐八年冬後一幅紹聖改元春也馮公時以太子少師致仕居京師而朱公為壽陽節度推官所謂蘇相蓋楊帥子容也馮公作此帖僅數月即夢奠于兩楹後六十六年朱公之孫叔召自蕪湖來求跋語按熙寧間馮公與王介甫同在政路能使介甫有所畏憚至為無使齊年知之語其正可知矣翰墨自應傳遠况家問乎惟某外祖少師初佐壽幕朱公實來為代兩家契好不薄其後叔召

遂為外祖孫壻云淳熙六年四月二十八日

跋秦少游帖

觀自去歲入京遭此追捕親老骨肉亦不敢留鄉里
治生之具緣此蕩盡今雖得生還而仰事俯畜之計
蕭然不給想公聞之不能無惻然也不知能為謀一
主學處否試望留意幸甚惠及銀杏尤見厚意感悚
忽遽未有以為獻者行甫聞授宣城是否家叔已赴
濱州渤海知縣祖父在彼幸安但地遠難得書耳李

端叔從軍近日都不聞耗不知何如也與公別未幾
世間事多變如此既可嘆復可笑耳何時展晤以盡
所懷觀再拜

少游作此帖猶未仕也今淮海集有對詔獄二詩所謂
一室如懸磬人音盡不聞老兵隨卧起漂母給朝曠者
殆去歲追捕時耶淳熙七年正月十四日東里周某同
崔大雅觀於吏部直舍

跋彌明石鼎聯句圖

昌黎公詩中有畫李伯時畫中有詩此雖臨本亦可見
吳生遠擅場之意

跋山谷萍鄉縣寶積禪寺記

寶積禪寺本周廣順中以民李氏施地宅建梵林寺寺
有僧伽像顯德中見光怪累日因改寶積寺星居六
室以元符二年十二月勅破律為禪以僧紹緊主之
而緊于萍鄉無法緣居十月而里人不施一錢于是
棄而去三年十月余伯氏元明為令乃擇請延慶院

山主宗禪來尸法席禪倦游諸方號稱得安樂法其
居延慶院也變飲酒食肉處為菩提坊開草萊荆棘
叢為金碧聚故元明以為是必能與我寶積三招而
後肯來至則破六律院為一叢林謗者杜口檀者傾
施不閱歲盡徹蜂房之屋鬱為驚峰之會建中靖國
之元方丈三間世尊之廟崇成矣越明年樂淨堂德
味厨法堂皆畢工凡率有家之錢五百萬而所以庇
覆安樂道衆冗徒之屋無不具使嚚訟者口談般若

鄙吝者心悅擅施若禪者可謂有功于此縣而其道行之化或溢于鄰邦矣伯氏來屬為禪記之故叙載如此崇寧二年十一月丁丑朝奉郎管勾洪州玉隆觀雲騎尉賜緋魚袋黃庭堅魯直記并書萍鄉縣令黃大臨元明立石

壬午歲涪翁航荆江略洞庭涉修水經七十二渡出萬載宜春省元明于萍鄉為留半月明年在武昌始作此記未閱月而承天院記之禍作遂長流宜州計未暇刻

石也故集本闕焉他日當同承天塔記附錄以成束皙補亡之義淳熙七年正月十四日

跋東坡草烏頭方帖

仇仙慕葛稚川陶隱居孫思邈之為人欲以救人得道故常留意名方此其一也淳熙庚子正月十四日

跋山谷書東坡聖散子傳

山谷作龐安常傷寒論後序云前序海上道人諾為之故虛石以待道人指東坡也今又書聖散子傳若安常

所謂得二公而名彰者耶淳熙庚子正月十五日

跋陳簡齋法帖奏藁

德壽皇帝嘗論近世絳帖已少錢希白所臨潭帖為勝
臨江帖失真遠矣又淳化帖大觀帖當時以晉唐善本
及江南所收帖擇善者刻之丰骨意象皆存今觀故參
知政事陳公與義為侍從時奉詔定法帖十卷釋文一
冊其間稍辨劉次莊之誤殆臨江或潭帖與陳公字畫
清簡類其詩文紹興初初步中朝故特承善誨知人則

哲茲可覲其緒餘淳熙七年正月十四日試吏部尚書
兼翰林學士承旨周某為起居舍人未待問題

跋鄧珽所藏其祖溫伯與東坡倡和武昌長篇
蘇鄧兩公同直禁話舊賦詩逮今踰八十載東里周某
始獲敬觀鄧氏別本于行在所因命院吏印其後印蓋
景德二年舊物兩公嘗佩之矣升堂伏几而襲其裳得
母象環之恧與淳熙庚子正月二十八日

跋趙忠簡公答魏侍郎砒手書

故吏部侍郎魏公邦達天資鯁挺忠憤自信方趙忠簡公再遷海島萬里通問情誼彌篤觀此答書概可見矣忠簡既薨歸窆衢之常山縣郡守知中外士大夫平時多書疏往來至是必爭持酒漿會葬意可為奇貨以媚時宰密諭邑尉翁蒙之以搜私釀為名馳往掩取蒙之許諾守猶疑漏言潛戒左右伺察之蒙之畧入解書片紙自後出迎趙氏子告之故趣盡焚篋中書及屏棄弓刀之屬比蒙之挾吏卒至一無所得守大怒劾于朝時

宰疑其已甚徙蒙之尉蘭溪使避守是時士氣未泯
問遷客議論時事決非一族微蒙之以身扞蔽則根株
牽連當起大獄魏公且為罪首非仁乎蒙之初被委苟
能避免便足取名然懼小人代尸其任則于善類奚益
故詭詞以承之陰謀以洩之忠簡之家賴以紓禍非智
乎凡小吏忤二千石罪或不測况相國深怨宿怒所懷
不得逞鼎鑊在前直趨弗顧非勇乎一物而三善從可
書也已蒙之字子功富沙人彥國之族也長不滿五尺

語不能出口見義必為不擇難易輕財樂施嘗鬻田宅
濟人之急交友付託之死弗背為一尉已能如此向令
踐貴位臨大節其所立必卓然不可及上初即位大臣
誦言其事詔特改京官除寺監簿出佐師幕再入為寺
監承年五十卒予懼其無聞故因是書表而出之庶幾
附趙魏二公而名彰云淳熙庚子三月二十一日書

跋唐相國梁國忠公為吏部侍郎加勲告

右唐相梁國忠公為吏部侍郎日加勲告一通子孫世

寶藏之至紹興吏部侍郎邦達蓋二十三世矣由神龍
己巳距今淳熙七年庚子已四百七十六年而印色如
新蓋古者百工之物皆良故能耐久如此按舊唐史中
宗以正月二十五日丙午即位于通天宮此告云二十
七日制者後兩日方覃赦也然所載推恩頗畧當以告
為正史又云二月甲子立妃韋為皇后內外官陪位者
賜勲一轉則與制合甲子乃十四日告稱十五日制者
後一日也

跋趙需張致遠魏矼奏劄

右紹興四年十二月臺雜魏公邦達副端張公子猷拾遺趙公公和同時議論疏一通具藁者魏公也欲上而改貳秘書張公實代之後四十七年魏公之子欽承以示東里周某敬題其後淳熙庚子三月十三日

跋先大父秦國公所作涪州使君李昌年墓誌銘

右涪州使君李公墓誌銘先大父宮傳所作先人少師

實書丹按李氏之先以勲業事太祖皇帝自是世有顯人誌其墓者又皆一時名卿凡園亭在汴都則有翰林王公元之之記丞相李文正公而下諸賢歌詩在洛中則韓忠獻王富文忠公司馬文正公而下皆賦焉今涪州曾孫衮之以予家三世通姻好萬里相訪且出其家傳石刻甚備獨涪州銘文不在乃錄本以遺衮之且以補史之闕文云淳熙八年辛丑歲謹記

跋江權卿所藏諸家帖

國朝兩制極天下之選文章名世者率居此官蘇門四子周旋館殿垂上詞掖乃復流落士大夫至今以為恨觀此數帖大略可見晁雖幸群正彙升然事亦隨變黃九卒不及聯事天官云淳熙八年三月五日

跋陳與義費肅張擴被召省劄

三英之召或云富季申為中丞日所薦館閣才嘉祐以前兩府初除各舉館職三兩人即時召試其後乃上簿候闕治平中歐陽文忠公蓋嘗論此官制既行盡歸秘

書省至元祐初復置館職許大臣各舉所知三人未幾
又罷太上皇帝當國步多艱之際兼采累朝故事涵養
異材富公方執法已能薦士如二府大用之意固自可
見已而遂升二府云淳熙辛丑中秋題

跋陳從古梅詩

淳熙辛丑冬淮浙告飢欲詳知郡縣荒政次第聞于上
退食接客或至日暮官舍後有梅一株不暇問訊何如
也同年陳兄晞顏和古今梅詩千篇聯為二十大軸遠

以相示秉燭快讀雖未容含英咀華固可望之止渴矣
夫以晞顏之學之才筆端袞袞宜有餘地然吟咏一草
木安能閎麗奧衍千變萬化不窮如此及讀最後兩卷
乃知自曾大父先大夫世以詩鳴皆眷眷于此花源遠
矣哉漢崔篆生毅毅生駟駟生子玉然後文名著唐杜
審言生閑閑生甫然後詩名顯彼日鍛月鍊雕肝琢腎
尚可能也多文以為富則非世業殆難能也十二月二
十日

跋伯父與鄭庶手書

紹興初叔父靜江府君為衡州安仁令某年七八歲因侍行而識武尉鄭幾仲其後伯父再守辰陽幾仲實為僚吏某時年二十餘矣由初迄今已五十載幾仲之子承信郎謨自長沙來出示伯父尺牘八幅前六幅乃某代作後兩幅手澤也死生契濶少壯衰老蓋有不勝嘆者淳熙九年三月九日

跋蘇石帖

歐陽文忠公好賢樂善充其天性得交友間寸縑尺書必軸而藏之况曼卿子美俊才直節公深知之雄詞健筆公素推之而位皆不過館職年皆不登知命此公之所尤悲也故于遺墨特致意焉熙寧壬子公夢奠之歲也猶親跋于卷尾去之百一十載會稽王佐以大司空行內史事得此本于公元孫歙尉伋欣慕前哲亟刻之石惟公道德文章師表百世而干旄緇衣之好之死靡倦彼爭名者相傾屬文者相輕聞公之風其少愧哉淳

熙壬寅八月辛丑

跋與徐林書

紹興末龍圖閣直學士徐公稚山以舊德再還從班宅
在銀鎗寨中予以左吏兼行詞掖居暗門城下相去百
餘步而東偏書室適隔一墻公忘年下交屢欲開便門
相過從予曰壁壘已定穿窬不由路如禮法何公笑而
止公既沒予挽之云昔者陪簪筆比憐銳鑿垣蓋謂是
也後二十年壬寅冬公之孫武康尉雲紀錄予中間答

公書以相示覽之悵然

題蘇子美草書蔡君謨大書跋帖

蘇草蔡真可稱為二絕淳熙癸卯仲春告朔周某敬觀
題唐人硬黃臨王獻之帖

臨本猶可愛如此況于真蹟伯時寶之伯長仲晦書之
不可不題其後淳熙癸卯二月朔

題米芾馬賦

元章詞筆俊拔略無滯礙使能約以法度博以學問則

生當獨步翰墨之場沒且登名文章之錄其成就豈止此而已惜夫淳熙十年二月一日

題蘇子美寶奎殿頌帖

仁宗朝摹太宗御書大相國寺額于石即寺為殿而藏之御飛白名曰寶奎殿舜欽此頌當是召試館職時所作年方三十餘也其云上宰宗工更為詞章者謂呂夷簡作記章得象題額之類與淳熙十年二月五日周某書而歸之玉山汪氏

題蔡君謨書柳子厚吐谷渾詞

蔡忠惠書洛陽橋記與吐谷渾詞皆大書之冠冕也淳熙癸卯月日

跋趙湖州祠堂記

右湖州刺史趙公子嶙祠堂記仲并所作其載守城之功甚備獨云事甫定公遽罷後以御史言復還又數月竟去凡稱罷者再漫不言坐何事予懼或者疑公為罪行故以聞諸太史氏者補之蓋己酉冬宣撫使出于無

策謬用武臣楊應誠代公守湖父老遮道閉關不能留
至明年五月上用臺評黜楊而還公公感上之知念民
之困也益思撫摩以為報會轉運使督緡錢十萬餉劉
光世軍而堂帖隨下謂州故貸椿錢二萬緡米七千斛
期以旬盡償公言民力不支請先軍需後償欠朝廷遂
勒公侮慢貶秩而罷其始末乃如此是豈以一時守城
為功可謂能固邦本矣湖人奉嘗至今有以也夫公子
伯衍屢求予書將刻之碑陰云淳熙十年九月十日

跋文潞公帖

熙寧大臣獎用新進指安靜為委靡故于邊防河事措畫紛然潞公在北都作箴頌四篇以諷而二頌尤深切著明殆諫書也時公年過七十筆力猶清壯如此非獨見其所養深厚亦足占壽考之祥矣是後安享富貴又二十載其年德名位可以伯仲衛武而中書之考幾于倍蓰郭令嗚呼盛哉此帖藏參知政事北陵張公家張公之孫大理寺丞抑以示東里周某敬題卷末淳熙十

年十一月二十三日

跋汪季路所藏山谷與柳仲遠帖

仲遠二蘇公堂妹婿柳君也故山谷此帖多及東坡頴濱其後坡祭妹文云玉立二甥一秀不實豈非所謂十三者耶淳熙十年閏十一月二十五日

跋汪季路所藏朱希真蹟

朱希真避亂南渡流落鎮海江浙間德壽皇帝因明索薦特召而用之既掛冠矣秦丞相擢其子為勅局刪定

官希真間來就養是時東閣郎君慕其詩名欲從之游
為修廢官留為鴻臚少卿希真愛子而畏禍不能引去
未幾秦薨例遭論罷出處固有可議然亦可憫也今觀
其字如其詩其詩如其人後世不待識面當知為伊洛
盛流矣

跋張魏公與連壅帖

富貴不足道孝弟忠信可以垂名百世利澤萬物紹
興辛酉重陽前一日書贈連君幾宜紫巖張德遠

應山連處士一布衣爾既沒而鄉人法其孝友禮遜凡
鰥寡飢饉之人皆追思之歐陽文忠公表其墓謂行之
以躬不言而信蓋實錄也有子四人而寶文公則第三
子之孫以文章贊書命才畧典方面克孝而忠大其家
聲今幾宜君復蒙上拔擢守蓬守邵進用未已施于有
政豈直如處士居鄉而已乎舉斯心加諸彼則上不負
天子下不負張忠獻公之言矣淳熙癸卯臘月丙寅

跋錢穆公與張文潛書

右錢穆父與張文潛書蓋元祐末紹聖初文潛自潤改
宣及謫黃州監當時也文潛妹歸穆父第二子東美婚
姻之故情誼款密其賀入翰苑啟猶載文潛集中所謂
內翰侍讀四丈者未幾竄逐元祐臣僚人以東坡兄弟
秦少游為諱而穆父憐問懇惻且有靈光歸然之語蓋
自況也最後勉文潛以勿入申出仍以閑詩文不著急
為諷意愛深矣淳熙癸卯閏月十三日偶觀此帖而刑
部侍郎曾仲躬適相過知其為錢出也問以得雌名同

兒謂誰仲躬曰即吾母魯國太夫人年七十飲食視聽
不少減予嘆曰賢者之孫固宜壽而康耶仲躬又為予
言外祖拔解後侍翰林使高麗既歸省試已終場不能
無悵然會開寶貢院大火至焚死考官有旨再試遂在
選中外祖喜甚翰林責之曰爾不念被焚者耶因併記
其語而歸之汪氏

文忠集卷十七

欽定四庫全書

文忠集卷十八

省齋文藁十八

宋 周必大 撰

題跋

跋汪季路所藏張文潛與彥素帖

朱希真父諱勅元祐紹聖之交為右司諫時張文潛為起居舍人故云同省今國史院有李仁父編國朝百官公卿表而諫官門逸朱勅姓名以是知闕文多矣淳熙

甲辰正月二十五日

跋汪季路所藏東坡作王中父哀詩

其後註云謝鯤事更

煩檢晉書

恐誤用

某幼于武臣張可久家見東坡序六一居士集起草至
作于其心害于其政發于其政害于其事四句每句上
下兩字用筆與全篇濃淡不同似初闕而後填者蓋孟
子又云生于其心害于其事發于其事害于其政一書
而文意交錯疑混故當審而用之耳前輩言坡自帥杭

後為文用事先令門人檢閱今觀東藁帖則已加詳矣
况暮年乎况他人乎

跋朝士送王校書通歸台州詩卷

校書居位不能滿其才此詩軸即柳儀曹先友記也淳
熙甲辰二月中

跋范文正公五帖

右范文正公五帖四世孫之柔所藏也其前家書四通
皆遺兄仲溫者以文正集考之嘗歷寧海軍節度推官

遷太子中書致仕後一帖字仲儀即王懿敏公也范氏
自忠宣公擢第皇祐之初至乾道八年而之柔乃復登
科中間寥寥蓋百二十有四載矣世濟其美尚知勉哉
淳熙十二年二月六日

跋喻子材樗帖

喻公子材邃于經學敏于詞藝紹興初館閣多俊傑視
題名可考也乾道壬辰予自小宗伯奉祠過無錫子才
老矣用兩夫肩輿迎勞于途議論纚纚使人聽之忘倦

其謂自天子至庶人皆有朋友三代而上每措之父子兄弟之間後世此道殊廢予至今紳書之汪季路其外孫也出示公道遺墨因題其後

跋劉器之帖

淳熙七年夏連州守臣頃首上尚書謹按國史諫大夫劉安世秉誼据正國之寶臣不幸官未應謚其曾孫孝騫嘗貢本州累援鄒浩蘇軾特謚故事以為請守臣不敢聞頃首上尚書六月丁酉制曰下禮部禮部下太常

太常博士宋之瑞議以慮國忘家曰忠德行不爽曰定
易安世之名九月甲戌復上尚書丞相臣雄參知政事
臣良臣臣某奏臨安行宮制曰可明年考功郎章森覆
謚議同十二月戊申始詔有司告其第于是天子旌嘉
遺直之德意忠定公死而不朽之令名暴白于天下孝
騫念祖之志伸矣他日出公二手帖泣而言曰曾祖在
竄斥中母亡子天患難極矣而應之猶能踰嶺迎奠今
正論既伸褒錫美謚而先父往歲貶死于連未克歸葬

乃無哀王孫者某聞而憐之為孝騫言孔君嚴節度嶺
海人士落南不能歸與流徙之胄百餘族咸受其賜今
廣帥采若轉運會叔提舉廷玉暨連守昌君皆尚友古
人樂善無厭第持二帖造焉必將念元祐之故家賡唐
賢之惠政孝騫其何慮十一年八月十日

跋尤延之家藏蘇子美四時歌真蹟

同時則妬賢嫉能異世乃哀窮悼屈古今殆一律也使
劉元瑜輩見子美詞翰于百年之後則所謂一網之舉

安知不轉為什襲之藏乎淳熙甲辰十二月三日

跋喻仲遷所藏蘇黃門翰林詔草答韓儀公辭

免同知密院詔

國朝內制非一種吏具檢徃徃列舊作于前今猶如此
別號屏風兒某頃跋汪氏所藏王岐公謝承旨學士表
併及陶翰林依本葫蘆之語正謂是也按元豐雜壓同
知密院雖在丞轄之下然二府迭居固不計此韓儀公
實自左丞除授豈應取序進加等之人以為式吏輩刻

舟記劍當發蘇公之一笑淳熙甲辰十二月中澣

跋蘇氏藏太宗御筆及謝表

臣嘗觀參知政事易簡之子耆續翰林志載其父既具狀謝宸翰之賜仍面奏辭字從舌乃是正文并檢虞世南書者辭字進呈太宗皇帝大悅曰非卿博識朕以為誤矣蘇氏寶藏此軸垂二百年而臣始得寓目謹錄其事附卷末使來者有考焉淳熙甲辰十二月二十二日

跋嚴汝翼所藏張丞相詩

詩律清遠有樂道憂世之心筆法妍楷無震矜怠惰之容觀此則忠獻公氣象畧可想矣嚴君既親薰而炙之宜為佳士今改秩宰茶陵足行所學尚其勉旃某亦公年家子也故敢附名卷末淳熙乙巳二月上澣

跋東坡代張文定公上書

東坡代張文定公上書蓋熙寧十年也其後為公墓碑明載老臣死見先帝有以藉口之語然則書雖成于坡手而意旨必出于公不然何其危言至是耶神廟時可

謂邦有道矣此藁比集本減數句改數字當以集為正
真蹟今藏會稽薛氏而同郡石氏安摹刻之淳熙十二
年二月清明節

跋蔣穎叔樞府日記

蔣魏公元符三年春自西帥再入翰林四月擢貳西樞
明年改元靖國七月升知院事又明年改崇寧十月以
觀文知杭州在政府二年有半此其日記也延之所以
謂度詞者如以祐陵為乘輿之乘蓋協律令第十卷兩

指曾子宣為淮西豈非以為其謫毫祠耶然九域志毫隸淮東不應言西也淳熙十二年九月晦

題陳去非帖

紹興乙亥歲某初仕王畿陳公之子本之為郎為監家藏手澤甚富每休務輒求觀竟日今踰三十年本之之子仁和宰復示此軸前輩翰墨愈久則愈可敬而本之墓木已拱又可嘆也淳熙丙午二月十三日

題陳去非謝御書等帖

光武中興誅戰不遑啟處然猶投戈講藝息馬論道樊
準在漢以為美談恭惟光堯皇帝撥亂于紹興之初維
時陳公周旋兩制遂踐政地觀此奏藁知君臣講藝猶
光武也論道細旃之上恨不得而聞之淳熙十三年三
月十一日

題彭仲衡家東坡書黃庭內景經石刻

集古錄有黃庭經二篇不著書人姓名其字亦止于不
俗一為六一先生所取而殿中丞裴造好古君子之名

遂得附見今武岡主簿彭銓仲衡收黃庭內景石刻蓋東坡書也重以穎濱山谷之詩李龍眠之畫視集古所錄自當過之所謂好古君子固應無歉于裴獨鄙言不足行遠為可愧耳淳熙丙午四月二十日

題劉丞相沆拜相制

一紀之間三題此告歲月逾邁而功業無聞愧歎久之
淳熙十三年五月十七日

題劉丞相沆追封充國公制

右元豐三年劉丞相追封充國公制典重簡尉字畫綾
紙皆渾厚亦可想當時氣象矣初至和中公與文富並
相王文安為參貳嘗同議立儲逮元豐褒典之行文富
皆在獨公已薨魏泰東軒筆錄所記歲月位序存亡皆
差謬小說固難信也淳熙丙午五月十七日

題富鄭公與劉丞相沆書

廬陵劉公至和二年實在相位富文忠書蓋是歲正月
方以觀文守河陽二月即拜宣徽使判閏六月遂與劉

公並位當時謂公素厚文忠力破朋黨之說致仁祖信任不疑合觀書辭信而有徵偶非親筆但書名耳淳熙丙午五月十八日

跋臨江軍廖節婦碑

臨江廖節婦以死衛姑不辱于賊郡人戶知之二千石屢以狀上尚書輒復報聞其子士元懇請不已迄未獲旌嘉之命蓋國家凡肆大青必曰義夫節婦孝子順孫長吏常切存恤事狀顯著具名以聞又曰忠臣孝子墳

墓所在州縣量加封護曾被旌表依式重立由前之說
專主生存故死節如廖有所不及由後之說雖主于死
然止云忠臣孝子故節婦復在所遺此有司具敕條時
以例相承未之思耳他日能詳著之則廖必預褒典而
士元之志庶其伸乎淳熙丙午五月辛巳

跋鄭景望詩卷

言學道者薄詞章近世則然景望龍圖通經篤行見謂
儒宗而其詩句乃綽有晉唐名勝之遺風胸中所養亦

可知矣自其云亡不特永嘉學者深惜之中外士大夫
皆惜之而予以舊交嘗僚尤惜之淳熙十三年十月十
日

題宋景文公家書

前輩謂文章當如作家書今觀景文公家書皆成文章
是固一理也淳熙丁未二月二十三日

題宋元憲公表藁

元憲公表藁辭理精粹真行燦然今蓋百五十餘年矣

明牕三復如見其人淳熙十四年二十三日

題洪景廬所藏王摩詰山水

自宗寧興畫學名筆間出有賜紫待詔高克明者頗得
摩詰用筆意當時其重之今已不克致况唐朝真蹟乎
淳熙丁未八月八日過史院翰林洪公景廬出示此軸
輒記其後

跋韓子蒼詩送劉童子歸廬陵

劉童子七歲能誦書部使者聞諸朝既至京師會更

制不果試其歸也以二小詩送之 七歲瀾翻數萬
言飢鷹引子望騰騫時平不用甘羅輩寂寞提書歸
故園 不作西京童子郎時人已自識黃鄉還家更
誦五千卷十八重來誼太常

廬陵劉童子眉宇秀發音吐琅然試六經語孟左氏傳
于太學覆試于中書其誦如流此外猶記他文數萬言
緣更制不復盡試纔免文解而歸乃父求詩送行屬光
堯喪言不能文姑錄韓子蒼二絕句以示之尚有味于

卒章淳熙丁未十二月日某書

題向鄉林家所藏山谷書南華玉篇

黃庭外景一篇世傳魏晉時道家者流所作自王逸少
以來高人勝士皆喜書之此三十六篇乃其義疏名曰
內景蓋養生之樞要也鄉林居士藏山谷先生所書有
年數矣其孫士虎遠以相示筆勢秀傑何待稱贊惟所
用字較光堯皇帝賜寧壽觀本差頗多如首句虛皇尊
今作虛皇前末句此其文今作此真文皆當以御書本

為正淳熙十五年二月旦日

題汪達季路所藏墨蹟三軸

右東坡祭范蜀公文藁所獲皆賢後作所得燦如長庚
後作燦焉誰復舉之後作似之蓋種自應獲既喻求賢
孰若得字之廣大也前已用今如星辰不必又云燦如
長庚改用燦焉則語健而意足以舉為似大率類此學
者因前輩著作而觀其所改定思過半矣淳熙戊申年
三月壬寅東里周某敬觀于太廟之齋廬

李西臺吾家膳部石曼卿鍾離景伯皆中原以書名者
朱希真尹彥明又皆南渡名勝季路藏此帖可謂好事
矣

題蘓季真家所藏東坡墨蹟

陸宣公為忠州別駕避諱不著書又以地多瘴癘抄集
驗方五十卷寓愛人利物之心文忠蘇公手書藥法亦
在瓊州別駕時其用意一也淳熙戊申三月十七日

元祐六年夏坡公既作聰聞復字序後三年春在武定

復和其見寄詩有前生同社之語又後七年當靖國辛巳蓋公夢奠歲也猶贈詩僧道通詩云雄豪而妙苦而腴祇有琴聰與蜜殊其愛之重之如此淳熙戊申三月與洪景盧同以永思陵使事留秦寧寺獲觀

文忠公在翰林兩因答臣僚辭免有所論奏其乞許安燾辭轉官見內制集當時真蹟未知存否茲其一也蘇氏宜世寶之淳熙戊申四月六日東里周某書而歸之
公元孫朴

題王樂道帖

右王文恪公與許州屬吏帖五世孫佐之出以相示且
曰秘閣有公文集三十卷惟奏議散佚不存予告之云
公事仁宗為臺諫事神廟為中丞其論奏甚多國史本
傳已載大畧當是時雖名臣比肩于朝然是非元不相
掩如劾陳升之則及史昭錫之兄言郭逵則云文彥博
之走史范仲淹之弄兒又謂韓魏公久專國政君弱臣
強乞行罷退一夕疏吳長文之罪至數千言皆見于司

馬溫公治平齋記欲不焚稿得乎佐之因請題其後淳
熙十五年四月八日

題范太史家所藏帖

儒者病乎寡要實錄牽于多愛自太史公已然況餘人
乎眉山李仁甫謂近則事詳遠則事略不當以繁省論
文其言美矣故續通鑑長編多採近世士大夫所著如
曾子宣日記之偏王定國甲申錄之妄咸有取焉若得
如范公者相與商度而斧藻之又善之善也淳熙戊申

十月十八日

右嘉祐六年春知舉翰林王公范公中丞黃公貢闈唱
酬一卷幅紙聯書則物無費隨手塗改則情甚真至于
宮商相宣金石諧和覽者自可玩味于詞翰之表太史
公有云假令晏子而存余雖為之執鞭所忻慕焉近時
張浮休題諸公與尹師魯帖乃謂假使皆無恙安得比
肩踵門而過我夫賢者可從而不可致太史公言之蓋
竊有取而未敢以芸叟為然也

跋向氏邵康節手寫陶靖節詩

康節先生蘊先天經世之學願獨手抄靖節詩集是豈專取詞章哉蓋慕其知道也宣和末臨漢曾絃謂舊本讀山海經詩刑天無千歲當作刑天舞千戚某初喜其援證甚明已而再味前篇專詠夸父事則次篇亦當專咏精衛不應旁及他獸今觀康節只從舊本則絃言似未可憑矣開歲倏五十或作五日近歲祁寬謂五十則與辛丑不合今康節直作五日尚何疑焉淳熙己酉重

明節舟次臨江鄉林向公之孫士虎出示此軸因表而出之

跋臨江守潘燾所收蔡君謨寫韓文三箴

蔡忠惠公書為本朝第一蘇文忠公言之矣誰敢改評至于因筆之正而知公心之正不在此三箴乎淳熙己酉重明節

跋彭惟孝求志堂記

夫子之門升堂入室者衆矣隱居求志猶云未見其人

蓋非伯夷叔齊莫能當也太和彭氏築堂而是之名以
似以續今三世矣至于孝求無念爾祖聿修厥德復形
于名字之間則其求之也其諸異乎人之求之與淳熙
己酉十二月十三日

跋呂居仁帖

紫薇舍人呂十一丈在政和初春秋鼎盛且方崇尚王
氏學以蘇黃為異端而手書立身為學作文之法乃如
此其師友淵源固有所自而特立獨行之操誰能及之

近世謂以詩名家是殆見其善者機耶嗣孫祖平力紹家學遠示此軸歎仰之餘輒附名于後充之老人姓唐諱廣仁承國諱枋蓋真宗朝參政安仁之後仲長之子也紹熙元年正月二十五日

跋臨江軍任詔盤園高風堂記

清江江西一支郡耳而士大夫未至者必問向氏薌林如何任氏盤園如何其至則未有不朝薌林而夕盤園也夫園林勝槩所在不乏何獨二氏擅名如此非以其

人之可貴與惟向公伯共早從前輩游旋受知高廟周旋中外事業顯著鄉林泛宅又形宸翰盛年掛冠而歸迄備洪範之五福其可貴固宜任侯子嚴出于名家自少年已負雋聲下筆輒數百言位官所至辨治蓋嘗親炙向公不但慕藺相如于後世也惟其才高志大不肯少下人以是屢起屢仆在官之日少閒居之日多歛藏智略盡力斯園殆與鄉林為鴻雁行數上書致仕子項在榻前明言其才願勿聽所請仍畀祠祿待他日之用

天子然之而侯必欲希蹤向公懇請勿已後二年竟伸其志是可貴也郡人南安太守章君茂獻嘗作高風堂記誦侯之美識者韙之予自念知侯久而疇昔薦進不力是一可愧叨塵過分未能如侯之納祿是二可愧四十年間往來不可計而才蕪思涸曾無一語形容園中之勝發揚主人之善是三可愧因茂獻之記姑自誌其過云紹熙改元二月既望

跋李次山雪溪漁社圖

唐元結字次山嘗家樊上與衆漁者為隣帶笈箸而歌
歎乃自號聾叟今河陽李君名元字次山卜築雲溪又
號漁社其善學柳下惠者耶始乾道間予官中都君以
先世之契數攜此圖求跋自念身遊東華塵土中欲為
西塞溪山下語難矣屬者奉祠歸廬陵所居在東城隅
去江無五十步洲名白鷺橫陳其前日以扁舟緣葦間
鷗來相從百住而不止雖未敢竊比張志和亦庶幾乎
元次山矣而君方以尚書郎奉使全蜀凡六十一郡之

官吏數十萬之將士莫不歛板受約束銜枚聽號令猶
念舊社不置萬里遺書與圖偕來督踐前約予欲遽數
忘機之樂則君權任如此願豈招隱時耶須君他日奏
記甘泉厭直承明尚寄聲于我當有以告君今未可也
姑題卷軸歸之紹熙元年三月三日適逢丁巳清原野
夫周某

題周噩兄弟閭立本樂治圖

圖畫見聞志叙古名筆最後有唐陸滉堯民鼓腹圖殆

此類與紹熙改元五月晦周某觀

又題款塞圖

周武王時四夷咸賓史官集其事為王會圖至唐貞觀三年東蠻入朝顏師古亦請繪蠻夷之在邸者以彰懷遠之德太宗令閻立本為之此豈唐人遺筆乎何意象之古也

題養正堂記并魯侯帖

古冀州養正堂記并與魯侯帖山谷為北京教授時所

作年方三十有五自云比平時書札似差老勁明年調太和宰秋歸江南真積力久詞翰又非前比所謂九萬里風斯在下矣紹熙元年五月晦周某觀于宗人虞卿兄弟家

跋倪求己所作鄒時飛行狀

鄒彥明之死其子時飛得內相洪景廬為之銘時飛死其子奎求鄉人倪丞狀其行寔又將謁銘于他邦予告之曰漢許劭兄弟俱有高名好共覈論鄉黨人物每月

輒更品題故汝南俗有月旦評夫人之善惡惟鄉評不
可掩爾家再世為蘆溪誠齋諸儒先所與未嘗改評則
其是非可考矣矧倪承甚文而賢乃父必賴以傳奚必
他求哉奎曰然謂歸而刻諸阡紹熙元年

跋王民瞻楊廷秀與安福彭雄飛詩

蘆溪王公主廬陵文盟者六十年繼之者今誠齋楊監
廷秀也觀二公品題彭君如此則其學問文采可知矣
袖書過我欲默不可請為祝辭附名于左惟蘆溪年近

期頤而筆不衰予祝雲翔他日與之齊誠齋仕都顯美而進未止予祝雲翔他日踵其趾豈特毋負二公之言亦庶幾鄉里斯文之得其傳乎紹熙改元

跋永和歐陽樗叟銘

歐陽樗叟一鄉之善士始予登第叟不以儒先臨我贈我以詩今四十年叟之墓木已拱而其子若孫復與予游皆謹厚好學不忘秋蘭朝菌之家訓叟為不亡矣讀胡忠簡公所述銘文不勝懷人念舊之嘆紹熙改元八

月十三日

記己酉杭州鄭樞密事

己酉四月七日新除端明殿學士同簽書樞密院事
鄭穀劄子奏臣自陛下退處別宮日夕憂憤計無所
出謂必藉外兵方可圖復兼義不當居職欲得以罪
去即北走平江金陵見張浚呂頤浩舉義事累章待
罪蒙太后降詔不允莫遂所請十四日忽蒙聖旨除
臣御史中丞臣職在彈擊官邪苗傅等悖逆肆虐擅

行殺戮十六日遂具章乞告示傳等便宜軍法只得
行于所轄兵卒其餘當聞之朝廷付有司以正刑典
又傳等日至都堂與朝廷事臣慮威福之柄下移不
敢愛死杭章極言謂朝廷近日差除多出苗傅劉正
彥之意而二人更迭出入都堂殆無虛日其所以敢
爾者必恃兵之強也王莽之兵非不强也昆陽一敗
莽卒授首乞告示苗傅等太后不欲降出臣章疏恐
傳等致害于臣及再上殿懇請乞降付三省以告示

之使傳等知畏縮則足以正朝廷之綱紀使其肆橫
害及臣身亦死職事臣不當避遂降出臣章疏傳等
果出怨言謂直擬其為王莽雖懷恨疾然亦少戢兼
聞以簽書樞密院召呂頤浩以禮部尚書召張浚又
分張浚之兵五百人歸陝西及浚不受尚書之命浚
不肯分所部兵遂謫浚以散官居郴州擢浚以節度
知鳳翔臣知皆出傳等姦謀假朝命使外無強兵謀
臣内生變亂事不可緩遂一章乞留呂頤浩知金陵

一章言張浚不當謫而求有膽氣謹密可共事之人
得奉議郎向令為客旅徒步如平江見張浚等具言
城中之事令嚴設兵備大張聲勢特重緩進使其自
遁無致城中之變驚動三宮此為上策撰杜鵑詩四
句親寫令攜去執呈諸人以為信驗詩云杜鵑飛飛
無定棲寄巢生子百鳥依園林花老晝夜啼安得百
鳥挾以歸取杜甫詩言蜀天子化作杜鵑生子百鳥
巢之意以杜鵑喻天子以百鳥喻百官言內外百官

當同心共謀挾天子反帝位以歸宮也向至平江以詩徧呈張浚呂頤浩劉光世張浚莫不嗟嘆至二十六日忽聞宣詔降陛下為元帥降新帝為監國太后獨垂簾聽政臣具章留百官班同宰執從官上殿謂列位太后聽政所以保有宋宗廟社稷今乃使趙氏子孫不得居帝位二十日之間降二皇帝使天下無君詔書一出則天下貢賦不至必有仗義而起兵者蒙太后開納宣諭褒美令臣往都堂商議遂得不降

詔書于四方漸謀復辟擢臣備員樞府三日而陛下復寶位此臣于陛下處別宮之後所言所行之事也伏望陛下于萬幾之暇特賜睿覽臣無任惶懼之至奉聖旨此可報行

右樞密鄭公已酉三月末家問一通尋復辟而上此奏四月七日有旨報行距今六十餘年後生往往不記其全文金匱大書既難輒覩龜山誌文亦載大畧故因公之孫出示此卷備錄奏篇而題其後紹熙庚戌八月二

十六日

書張欽夫柅劉文潛煇與蔣邕州書

亡友張欽夫劉文潛皆眼高四海未嘗輕以一字許人
先後帥桂林聞張邕州遺愛及華夷大書至數百言推
是以考其平生則張安國之銘豈諛墓者壽祿不于其
身有子而才自宜光顯于世而礪也三抑于春官六十
未離選調以此知遠方賢能阨窮不少矣予嘗在進退
人材之地深有愧于斯文紹熙元年九月甲子

題與王洋手書

泉江王嘉謨蚤以經術詞章首鄉舉名聲籍籍晚仕州
縣止于選調人皆惜之二孫種學績文不忝乃祖攜予
頃歲書帖相過請記于後讀之恍然殆如隔世芻狗已
陳豈應復盛筵衍蕉鹿雖在未知其為彼夢耶我夢耶
紹熙改元九月二十四日

跋楊忠襄與鄉人羅錡詩帖

右忠襄楊公與友人羅錡士廉詩帖各二羅之姪孫泌

實藏之予聞楊司業告諸生曰學者所以學為忠與孝也方政和中二公同游太學每以是相勉不幸士廉年纔三十一死親之喪鄉人推為孝子名士胡份兼美實為之銘厥後忠襄遂死于忠國史書之萬世仰之平生取友如此真賢矣哉紹熙庚戌十月一日

題郭知章告身後

右內翰郭公自玉堂出帥南陽告身一通其曾孫積中得于浸漬之餘攜以相示亦可謂之名臣矣惟紹聖以

來權臣用事居言路者人知其難既晚入黨籍則大畧
固可考云紹熙元年十一月五日少保克醴泉觀使益
國公周某

書龔夬傳後

徽宗實錄進于紹興末重修成書在淳熙之四年龔公
一傳微有增損要是後錄為詳如論郝隨鄧洵武前皆
畧之比歲所進四朝國史列傳蓋取諸此初乾道中公
曾孫頤正嘗請中書舍人張君孝祥書舊傳刻之石今

復俾某題其後乃錄新傳以遺之惟公學術豈晚生所
敢輕議至于守道不阿尚可推考方王荊公不喜春秋
公則詳為之傳知非苟從王氏者迨元祐初司馬文正
力闢王說公乃反覆申辨不為少屈文正雖有習氣之
語不害其為篤實也厥后哲宗疑元祐大臣出公于外
而公奏陳之意猶前日所以對文正也二三十年間士
大夫徇時向背者多公獨始卒如此是宜人主信之學
者尊之勁正如鄒忠公序公易傳至謂其說可與易偕

行不朽而以門人自名則公學術可知矣公父諱大同
號枯蒼名士子若孫立身蒞官皆不苟至順正博通史
學嫻于辭章諸公交薦諸朝天子特命以官今居姑蘇
閉戶著書近世言儒門者惟推龔氏云紹熙庚戌十一
月十三日

題郭彥逢庚午解牒并易辨說

紹興庚午廬陵郡秋試數千人預貢者六十有一郭君
彥逢名在第五又魁易之一經其才學可知已時君年

過五十不復西笑故解牒猶在其孫特起同文藁襲藏
惟謹復著易辨十篇自乾卦至繫辭皆為訓說謂予昔
忝同升攜以相示追惟四十年間所謂六十餘人存者
殆若晨星其子若孫能以一經傳家有如郭氏者鮮矣
予聞萬安為邑在熙寧五年今將兩甲子英才項背相
望策第大常何為寂寥念爾祖而破天荒不在此時乎
尚其勉之哉紹熙庚戌十二月十二日

記李太白廬山詩

我本楚狂人鳳歌笑孔丘手持綠玉杖朝別黃鶴樓
五嶽尋仙不辭遠一生好入名山遊廬山秀出南斗
傍屏風九疊雲錦張景落明湖青黛光金闕前開二
峯長銀河倒掛三石梁香爐瀑布遙相望迴崖沓嶂
凌蒼蒼翠影紅霞映朝日鳥飛不到吳天長登高壯
觀天地間大江茫茫去不還黃雲萬里動風色白波
九道流雪山好為廬山謠興因廬山發閑窺石鏡清
我心綠蘿開處懸明月早服還丹無世情琴心三疊

道初成遙見仙人綵雲裏手把芙蓉朝玉京先期汗漫九垓上願接盧敖遊太清

廬山之南有尋真沖虛觀古名詠真道書真誥述三十六洞天而詠真為第八七十二福地廬山為元辰福地是觀即詠真洞天五老峯正在其後唐貞元間女冠蔡尋真居之因以名觀後有白龍潭飛瀑注焉舊史云漢武帝過九江築羽章館于屏風疊下臨相思澗今五老一峯疊石如屏嶂蓋其故地潭上有綠

淨亭

右見熙寧中陳令舉賢良廬山記乾道丁亥十月己未
予來游宿焉明日登採訪使者閣望疊石峯僅在百步
間相連即獅子峯石山無草木曉日下昭如赤城竒姿
巧勢不可名狀乃取李太白屏風九疊雲錦張之句題
其牓曰雲錦閣龍潭在觀後里許水作琉璃色其中數
尺正黑知觀湯善翔云深數十丈相傳為洞天之門未
知然否潭上有靈澤龍祠殆綠淨亭基耶淳熙己酉秋

艤舟南康畧來山南不暇再往惟一至折桂登黃雲觀而歸回首舊游垂二紀矣明年道錄皇甫居中以事來廬陵求予書太白詩將刻之觀中欣然許之黃雲正倚五老雖晚出然登覽最遠前守朱元晦所創其名亦出此詩云紹熙庚戌

跋太和樂南金所藏樂史慈竹詩

慈竹亦名桃枝竹唐王勃喬琳皆嘗為賦勃云叢生枝茂天長地久萬抵爭盤千株競糾如母子之鈎帶似閨

門之悌友琳謂九族睦叙孝友威儀是竹必滋五服相
殘骨肉攜離是竹必衰苟自家而刑國亦觸類而增思
其于摹寫諷諭固已畧備又得本朝留臺樂公此詩然
後懲勸之旨粲然畢陳于前凡在士庶自當家傳而人
誦之况公苗裔乎刻之宜矣紹熙元年九月二日

題韓文公黃陵廟碑

孔安國釋書陟方為升遐言簡而易通學者可類推也
韓文公作黃陵廟碑乃訓陟為沒蓋疑東南卑下宜言

下方不當言陟遂以方乃死為釋此陟字其說雖新某竊有疑焉不敢引他經為證姑以伊尹告太甲質之其曰升高必自下陟遐必自邇蓋以陟遐為陟遠也舜自中國南巡非陟遠乎况地勢雖下其間自有崇岡峻嶺何害其云陟也大抵古文簡少一字數義如爾雅以初哉首基肇祖元胎俶落權輿為始故注詩者釋訪落為謀始可謂簡而有據矣然則楚詞餐秋菊之落英其指初英無疑或者不思訪落之意直以為隕落遂至輾轉

相譏其失遠矣因文公之說併及之



文忠集卷十八